




ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ
ԾՆՈՐՀԱՎՈՐԱԿԱՆ ԳԻՐԸ ՓՐԿՉԻ ՀՐԱԾԱՓԱՌ ԵՎ ՍՈՒՐԲ
ՀԱՐՈՒԹՅԱՆ ՏՈՆԻ ԱՌԹԻՎ՝ ՈՒՂՂՎԱԾ ՀԱՅԱՍՏԱՆՅԱՅՑ
ԵԿԵՂԵՑՈՒ ՆՎԻՐԱՊԵՏԱԿԱՆ ԵՐԵՔ ԱԹՈՒՆԵՐԻՆ,
ԹԵՄԱԿԱԼ ԲՈԼՈՐ ԱՌԱՋՆՈՐԴՆԵՐԻՆ ԵՎ ԵԿԵՂԵՑԱԿԱՆ
ՀԱՄԱՅՆՔՆԵՐԻՆ

«Քրիստոս յարեալ ի մեռելոց»:

Հարուցյալ Փրկչի իջման սուրբ սեղանեն այսօր երջանիկ ենք Ձեզ
բերելու նվիրական ավետիսը սուրբ Հարության հրաշքին, որ աշխարհն ու
պատմությունը լեցուց կենարար ու ստեղծարար շնորհներով և մանավանդ
սիրո և խաղաղության շնչով:

Մեր օրերուն առավել քան անցյալի մեջ, տագնապներով լի մարդկու-
թյունը ծարավն ունի Քրիստոսի փրկարար սիրուն և շնորհներուն, հասնե-
լու համար ազգություններու միջև համերաշխ գործակցության և իրավ խա-
ղաղության նավահանգիստը:

Այսօր, սուրբ Զատիկի լուսաբացին, թող համայն աշխարհին ու նաև
մեր Մայր եկեղեցիին և մեր հարազատ ժողովուրդին առատապես բաշխվին
ամենահաղթ շնորհները սուրբ Հարության Փրկչին մեր Հիսուսի Քրիստոսի:

Սուրբ Հարության շնորհներով, նաև առավել լույս և առավել հոգե-
շեն եռանդ Ձեզ և համայն Մեր հավատացյալ զավակներուն:
Եղբայրական սիրով ի Քրիստոս՝

Վ Ա Զ Գ Ե Ն Ա

ԾԱՅՐԱԳՈՒՅՆ ՊԱՏՐԻԱՐԿ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՏ

Ա. ԷԶՄԻԱԵՐՆ

*
*
*

Փրկչի հրաշափառ և սուրբ Հարության տոնի առթիվ Ամենայն Հայոց Վեհափառ Հայրապետի անունով ստացվեցին ամենաջերմ և հարգալից զգացմունքներով զեղուն բազմաթիվ շնորհավորական հեռագրեր և նամակներ մեր նվիրապետական երեք Աթոռների գահակալներից, արտասահմանի և ներքին բոլոր թեմերի առաջնորդներից, ազգային-եկեղեցական, մշակութային, հայրենակցական, տիկնանց, օրիորդաց և երիտասարդաց զանազան կազմակերպություններից, հայ և օտար պաշտոնական անձնավորություններից:

Հանուն Հայոց Հայրապետի սրտագին շնորհակալություն ենք հայտնում ստացված պատասխան շնորհավորանքների համար:

